



*Rabu, 03 Januari 2024*  
**Ogen : Kejadin 47:11-12**



**Nikapken Si Mehuli**



**S**elamat tahun baru man banta kerina. Meriah ukur i bas suasana tahun baru, sabap i je kita sidahi-dahin ras sangkep geluh. Ku rumah keluarganta kita, si baba ka anak-anakta, pagi kita ka idahi teman-teman ras kade-kadenta. Paksa sidahi-dahin e meriah siakap, labo lit i je encakapken utang entah persoalen-persoalen. Si lit i je si salam-salamen, nasapken kesalahen sada ras sidebanna. Banci ka i bas situasi e sibahan ka acara nutung-nutung ikan entah daging. Sibahan ka i je music karaoke ras sidebanna.

Bage me Jusuf pe ngalo-ngalo sangkep geluhna i Mesir. Meriah kal akapna banci pulung ras kerina senina-seninana bage pe bapana. Arah pengalo-ngalona e teridah maka ia enggo ngalemi kerina senina-seninana. I bas ia pulung e isikapkena pe pangan si mehulina. Man-man ia kerina, ibagi-bagikan Jusuf pangan si mehulina man senina-seninan. Malem ate sinina-seninan ngidah perbahanen Jusuf.

Perjumpaan ras senina-seninana e jadi sada suasana si mabru. Sabap enggo ndekah suasana si bage lanai jadi. Sedekah Jusuf idayaken ku Mesir, bapana pe lalap la ermeriah ukur, terdaram-daram. Adi enggo mate ningen, la idah bangkena. Adi nggeluh denga la idah jelmana, e erbahansa serbut rusur ukurna. Paksa perjumpaan ras Jusuf e, mulihken keriahen ukurna si enggo pernah bene.

Bage min si jadi i bas kita ertahun baru. Pulung meriah, man ras-ras dingen sialem-alemen salah. Bene ukur serbut, puluh ukur gulut. Di kita tuan rumah sisiakpken dage simehulina man temue ras sangkep geluhta. Pasu-pasu Tuhan e simpar ka man banta i bas tahun enda.